

四庫全書

集部

欽定四庫全書

集部

宋詩紀事卷八

詳校官給事中臣鄧文泮

侍讀臣孫球覆勘

總校官進士臣繆琪

校對官中書臣朱圻

謄錄監生臣蔣鳳柱

欽定四庫全書

宋詩紀事卷七

錢塘厲鶚撰

孫僅

僅字鄰幾何弟咸平元年進士第一累官集賢院學士權知開封府後領審刑院進給事中卒

有甘棠集

通水燕談孫何孫僅學行文詞傾動場屋何既為狀元王黃州覽僅文編書其後曰明年再就堯堦試應被人呼小狀元後榜僅果為第一黃州復以詩寄之云病中何幸忽開顏記得詩稱

小狀元粉壁乍懸龍虎榜錦標終屬鵲鴿原并
寄何詩曰唯愛君家棣華榜登科記上並龍頭
潘逍遙亦有詩曰歸來徧檢登科記未見連年
放弟兄而陳堯叟堯咨兄弟亦前後相繼為狀
元實士林盛事也

勸書

儒官無外事招客勸青編筆墨東西置朱黃次第研頻
憂傷點竄細恐誤流傳改是文辭正增加字數全端坐
窮今古披襟見聖賢得興忘昏曉題名記歲年棲毫思
確論廢卷為忘篇魚魯皆刪定誰人敢間然

宋文鑑

贈种徵君放

雄名英槩比君難二十高名滿世間
飛詔幾回來北闕草玄終不出南山
詩篇落處風雷動筆力停時造化閒
仙術每將丹訣解史才曾把逸書刪
家僮只有猿隨從坐客唯聞鶴往還
兩制詞臣求識面九重天子望祇顏
處士星孤輕世俗大夫松好賤官班
碁殘夜石秦雲斷琴徹秋砧蜀月彎
朝議蒲輪看再降宵教從此老柴關

合璧事類後集

句

汾水冷光搖畫戟
蒙山秋色鎖層樓

送劉綜學士出守并門詩話總龜

李慶孫

慶孫泉州惠安人咸平元年進士官水部郎

句

軸裝曲譜泥金字
樹記花名玉篆牌

韻語陽秋晏元獻云太乞兒相若諸富貴者不爾也

錢易

易字希白昆之弟歸宋中咸平二年進士仕為翰林學士卒有金閨瀛洲西垣制集

擬張籍上裴晉公

午橋莊上千竿竹綠野堂中白日春富貴極來唯歎老
功名高後轉輕身嚴更未報皇城裏勝賞時遊洛水濱
昨日庭趨三節度淮西曾是執戈人

許彥周詩話錢希白作擬唐詩百篇備諸家之體自序曰今之所擬不獨其詞至于題目豈欲拋離本集或有事疏斯亦見之本傳

嵇康小舞詞

并序

薛九江南富家子得侍宮中善歌舞嵇康嵇康江南
曲名也學舞於鍾離氏建業破零落於江北予過於
洛陽福善坊趙春舍飲酣於是歌嵇康其詞卽後主
所製焉嘗感激坐人皆泣春舉酒請舞謝曰老矣腰
腕衰硬無復舊態乃強起小舞終曲而罷座有王生
者請予為嵇康小舞詞

薛九三十侍中郎蘭香花態生春堂龍盤王氣變秋霧

淮聲哭月浮秋霜宜城酒煙濕羈腹與君強舞當時曲
玉樹遺辭莫重聽黃塵染鬢無前綠我聞襄陽白銅鞮
荒情古豔傳幽悲淒涼不抵亡國恨座中苦淚飛柔絲
洛陽公子擎銀觴跪奴和曲生輝光茂陵旅夢無春草
彤管含羞裁短章

補侍兒小名錄

西遊曲

花銷秋老白日短敗紅荒綠迷空館擬將清血灑昭陵
幽谷蛇啼半山晚十年辭家勤獻書王孫不許延公車

江頭祖廟祭無血重門生草寒離離我有王孫三尺劍
姦骨無痕古波豔佩入函關無故人玉握凋零七星暗

宋文鑑

句

綠章封事緘初啓青鳳求凰尾乍開

芭蕉
談苑

楊文公雙

蜂上簾額獨鵲裊庭柯

詩人玉屑

李堪

堪字仲任晉陵人咸平二年登第景德間為古

田令官至工部尚書

仙樓道院

在古田縣五華山

尋源探雲霞中有金仙家綺疏見飛翬雕闌燦朱華珍
禽棲不去靈液流無涯晴旭起風篴空香送天花春雷
會社鼓寒煙聚海茶奇峰媚如削芳樹一何嘉且將白
閣齊絕與紅塵賒終然謝朝紱此地營丹砂

福州府志

句

海月隨帆落溪花遶驛流

送周建州

皇朝類苑

陳堯咨

堯咨字嘉謨堯佐弟咸平三年進士第一歷官翰林學士武信軍節度使知河陽又徙天雄軍卒贈太尉諡康肅

普濟院

在餘桃

山遠峯峯碧林疎葉葉紅凭闌對僧語如在畫圖中

會稽

志

題三桂亭

不誇六印滿腰懸二頃仍尋負郭田當日弟兄皆刷羽
如今鴻雁盡摩天扶疎已問新栽竹清淺猶尋舊漱泉
大尹今來還又去夕陽旌旆復翩翩

陝西通志三桂亭在長安城南宋諫議大夫陳
公之別墅三子堯叟堯佐堯咨皆登科故亭因
以名大中祥符間堯咨知永興軍書詩于碑至
今猶存

邵煥

煥淳安人咸平三年進士仕至員外郎

句

官船風破浪關吏鼓通晨

送晏集賢南歸

皇朝類苑

李永

句

朝憑玉几言猶在夜啓金縢事已非

熙陵挽詞
退朝錄

春明

鄭戩

戩字天休吳縣人舉進士累官右諫議大夫樞

密副使以資政殿學士知杭州復為陝西四路

安撫使拜奉國軍節度使卒贈太尉諡文肅

句

春至不擇地路旁花自開

嘉祐雜志長安北禪寺荀石鄭天休資政題十字刊之

許式

式字叔矜吳郡人咸平三年進士官比部郎中

出守南昌終轉運使

寄洞山聰禪師

語言全不滯高躡祖師蹤夜坐連雲石春栽帶雨松鑑

分金殿燭山苔月樓鐘有問西來意虛堂對遠峯

林閑錄

王曙

曙字晦叔河南人東臯子績之後舉進士咸平

中舉賢良方正科策入等仁宗朝歷官樞密使

拜同中書門下平章事卒贈太保中書令諡文

康有集

回峯院

山勢欲壓海禪局向此開魚龍腥不到日月影先來樹

色秋擎出鐘聲浪荅回何期隨吏役暫得拂塵埃

娛書堂詩話文康王公晦叔嘗宰定海縣賦回峯院詩云云商逸卿得遺墨刻之

句

千山送客東西路一樹照人南北枝

茗溪漁隱叢話

許洞

洞字洞天吳郡人太子洗馬仲容之子咸平三年進士以忤知州馬知節奏除名祥符初祀汾陰獻三盛禮賦官烏江主簿有集

歐公詩話許洞進士及第無名子嘲曰張康渾
裏馬許洞閭裝妻

吳郡圖經續記許洞以文辭稱于吳尤邃左氏
春秋嗜酒嘗從酒家賃飲一日大寫壁作歌數
百言鄉人競來觀之售數倍乃盡捐其所負
吳郡志許洞所居常植一竹以表特操吳人至
今詠之曰許洞門前一竿竹

贈潘閬

潘逍遙平生才氣如天高倚天大笑無所懼天公嗔汝
口叟叟罰教臨老頭補衲歸中條我願中條山神鎮長
在驅雷叱電趕出者老怪

中吳紀聞洞與潘閬錢易為友狂放不羈閬坐
盧多遜黨亡命乃變姓名僧服入中條山洞密
贈之

王曾

曾字孝先益都人咸平五年鄉貢試禮部廷對
皆第一仁宗朝拜右僕射兼門下侍郎平章事
集賢殿大學士封沂國公卒贈侍中諡文正

歷代吟譜王曾投呂文穆早梅詩雪中未問和
羹事且向百花頭上開呂公曰此生次第安排
作狀元宰相矣後果然

澠水燕談王文正公曾李文定公廸咸平景德

間相繼狀元及第其後更踐政府及罷相鎮青
又為交承故文正送文定移鎮兗海詩有錦標
得雋曾相繼金鼎調元亦踐更之句又云并土
兒童君再見會稽章紱我偏榮蓋文定再鎮兗
而青社文正鄉里也

皇帝閣立春帖子

北陸凝陰盡千門淑氣新年年金殿裏寶字帖宜春

合璧

事類前集

送何水部蒙出牧袁州

雉省榮遷拜命新魚符重佩出關頻停驂卻訪粉榆社

戀闕迴瞻析木津
水薤有誰裨政術
江山終日助吟神
一麾嶺外遙相望
應合趨庭問絹人

江西通志

句

欲謝君恩卻無語
心前笑指赤靈符

夫人閣端午帖子
合璧事類前集

陳亞

亞字亞之維揚人咸平五年進士嘗為杭之於
潛令仕至太常少卿好為藥名詩有澄源集

迂叟詩話陳亞郎中滑稽嘗為藥名詩百首其
美者有風月前湖夜軒窗半夏涼不失詩家之

體

郡齋讀書志藥名詩始于唐人張籍有江皋歲暮相逢地黃葉霜前半下枝之句人謂起於亞之實不然也

絕句

滿室圖書雜典墳
華亭仙客岱雲根
他年若不和花賣
便是吾家好子孫

澠水燕談陳亞少卿畜書數千卷名畫數十軸平生之所寶者晚年退居有華亭雙鶴怪石一株尤奇峭與異花數十本列植于所居為詩戒子孫云云

登湖州銷暑樓

重樓肆登賞豈羨石為廊風雨前湖夜軒窗半夏涼
青識漁浦芝紫認仙鄉卻恐當歸闕靈仙為別傷

宋文鑑

惜竹

出檻亦不翦從教長舊叢年年到朱夏葉葉是清風

庚溪

詩話

懷舊隱

多愧當年未第間卜居人外得清閒排聯花品曾非僭
愛惜苔錢不是慳秋閣詩情天淡淡夕溪漁思月彎彎

而今慚厚明朝祿敢念藏愚莫買山

瀛奎律髓

句

浪平天影接山盡樹根回

翰府名談

棊為臘寒呵子下衣

嫌春瘦縮砂裁

藥名

馬嘶曾到寺犬吠乍行村

郊行上青箱雜

記

章得象

得象字希言浦城人咸平五年進士累遷兵部

郎中知制誥翰林學士寶元初拜同中書門下

平章事集賢殿大學士慶歷中拜鎮安軍節度使封郇國公徙判河南府守司空卒贈太尉兼侍中諡文憲改諡文簡

巾子山翠微閣

在台州

步步雲梯徹上層回頭自覺欲飛騰頻來不是塵中客
久住偏宜物外僧下寺鐘聲沈地底前峯塔影落堦棱
凭闌未盡吟詩興卻擬乘閑更一登

赤城志

玉光亭

在玉山縣

千層懷玉對軒窗池上新亭號玉光祇此便堪為吏隱
神仙官職水雲鄉

方輿勝覽

峽山飛來寺

澄江詰曲峽中天遠使歸時駐畫船久別忽經星一紀
暫來纔見月三弦勞生草草真徒爾陳迹依依亦愴然
回首越城何處是山南渺莽只雲煙

廣東通志

李冠

冠字世英歷城人以文學稱與王樵賈同齊名

官乾寧主簿有東臯集

寄王肩望

霜臺御史新為郡棘寺廷評繼下車
首謁梓桐王處士
教風從此重詩書

澠水燕談王樵字肩望淄川人性超逸深老易
善擊劍有概世之志廬梓桐山稱淄右書生不
交塵務山東賈同李冠皆尊仰之咸平中契丹
內寇舉族北俘潛入虜中訪其親累年乃歸持
諸喪刻木為親葬與山東立祠奉侍終身太守
劉通詣樵踰垣遁去其後高弁知州事范諷
為通判相與就見之李冠以詩寄之晚自號贊
世翁為贊書其門曰書生王樵薄命寡志無益

於人道號贅世豫卜地累卵名藹室中壘石刻
銘其上曰生前殺軀以虞不備沒後寄魄以備
不虞後感疾卽入室自掩戶乃卒以古劍殉葬
著遊邊集安邊三策說史皆散失濟南李芝為
贅世先生傳載其事

王貽永

貽永字季長祁人溥之孫咸平中尚太宗女鄭
國長公主累官樞密使同中書門下平章事拜
尚書右僕射檢校太師卒諡康靖

句

河朔雪深思愛日并門春暖詠甘棠

送劉綜學士出守并門詩話總龜

李廸

廸字復古鄆城人景德二年舉進士第一歷翰林學士給事中參知政事拜吏部侍郎兼太子少傅同中書門下平章事致仕卒贈司空侍中

諡文定有集

題河陽後城平嵩閣

南指嵩高北太行大河中出貫靈長君王不恃金湯險

自有仁恩結萬方

宋文鑑

晏殊

殊字同叔臨川人七歲能屬文景德初以神童
召試賜進士出身累擢知制誥翰林學士慶厯
中拜集賢殿學士同中書門下平章事兼樞密
院使出知永興軍徙河南以疾歸京師留侍經
筵卒贈司空兼侍中諡元獻有臨川集紫微集

歸田錄晏元獻善評詩嘗云老覺腰金重慵便
枕玉涼未是富貴語不如笙歌歸院落燈火下

樓臺此善言富貴者也人皆以為知言

宋子京筆記云天聖初元以來縉紳間為詩者益少唯丞相晏公殊錢公惟演翰林劉公筠數人而已晏丞相末年詩見編集者乃過萬篇唐人以來未有然晏不自貴重其文凡門下客及官屬解聲韻者悉與之酬和云

郡齋讀書志殊性剛峻幼孤篤學為文溫純應用尤長於詩抒情寓物詞多曠達當世賢士如范文正歐陽文忠皆出其門女適富鄭公楊察世稱其知人云

示張寺丞王校勘

元巳清明假未開小園幽徑獨徘徊春寒不定斑斑雨宿醉難禁盪盪杯無可奈何花落去似曾相識燕歸來

遊梁賦客多風味莫惜青錢萬選才

復齋漫錄晏元獻因觀王琪大明寺詩板大加稱賞召至同飯飯已又同步遊池上時春晚有落花晏公每得句書牆壁間或彌年未嘗強對且如無可奈何花落去一句至今未能對也王應聲曰似曾相識燕歸來自此辟置館職遂躋侍從

和宋子京召還學士院

網索軒窗邃鑾坡羽衛重鷁舟還下瀨星駟出飛龍賦

待三英集詩須五吏供會看邊燧息橫觀紫泥封

復齋漫錄

立春祠太乙

紫花雙節引青童一片空歌韻曉風太昊茲辰授春令
鸞旗應在喬雲中

華燈明滅羽衣攢翠柳蕭森矮檜寒千步回廊繞金殿
水蒼瑤佩響珊珊

上巳瓊林苑宴二府同游池上卽事口占

殿後花枝白間紅樓前當道綠楊風橫飛綵艦波光外
倒寫朱橋水影中

曲榭迴廊手伎喧綵樓朱舫鼓聲繁游人已著濃春去

不待歌長舞袖翻

寒食東城作

王城百五車馬繁重帷黝幕紛郊原游人得意惜光景
恣尋複樹登高軒平蕪遠水知何許眼裏迢迢空處所
梨花澹豔柳絲長百計撩春作烟雨歌哭聲中半落暉
瑣鞍繡轂尚遲歸荒田野草人間事誰向伶玄淚滿衣

七夕

百子池深漲綠苔九光燈迴照浮埃天孫寶駕何年駐

阿母颺輪此夜來空外粉筵和霧溼靜中珠幌徹明開
秋河不斷長相望豈獨人間事可哀

中秋月

一輪霜影轉庭梧此夕羈人獨向隅未必素娥無悵恨
玉蟾清冷桂花孤

以上古今歲時雜詠

詠上竿伎

百尺竿頭裹裹身足騰跟挂駭傍人漢陰有叟君知否

抱甕區區亦未貧

侯鯖錄

弔蘇哥

蘇哥風味遍天真恐是文君以上人何日九原芳草綠
大家攜酒哭青春

西清詩話元獻初罷政事守亳社每歎士風彫落一日營妓曰劉蘇哥有約終身而其母禁之至苦不勝鬱悒方春物暄妍馳駿馬出郊登高冢曠望長慟而卒元獻云士大夫受人盼睽隨燥溼變渝如翻覆手曾狂女子不若為序其事以詩弔之云

東軒筆錄晏元獻當國子京為翰苑晏愛宋之才雅欲旦夕相見遂稅一第于旁近延居之其親密如此遇中秋宴客晏召宋出妓飲酒賦詩達旦方罷翌日罷相宋當草詞頗極詆斥至有

廣營產以殖私多役兵而規利之語觀者駭歎
苕溪漁隱叢話元獻弔劉蘇哥詩序蓋指子京
而言也

煮茶

稽山新茗綠如烟靜挈都籃煮惠泉未向人間殺風景
更持醪醑醉花前

西清詩話李義山雜纂品目數十蓋以文滑稽
者其一曰殺風景謂清泉濯足花上曬禪背山
起樓燒琴煮鶴對花啜茗松下喝道晏元獻守
潁以惠山泉烹日注茶從容置酒賦詩云云自
此殺風景之語頗著于世

孟蘭盆

紅白薇英落朱黃槿豔殘
家人愁溽暑計日望孟蘭

老學菴筆記故都殘暑不過七月中旬俗以望日具素饌享先織竹作盆貯紙錢焚之謂之孟蘭盆以為孟蘭盆倒則寒來矣晏元獻詩云云

張殿院惠古瓦硯

鄴城宮殿久荒涼
縹瓦隨波出禁牆
誰約蘚文成古硯
等閒裁破碧鴛鴦

已恣玉鋒磨蘚骨
更持蟾淚溼雲根
欲知千載淒涼意

尚有昭陽夜雨痕

硯箋

初秋寓直

絡河星斗夜闌干
禁署沈沈閉九關
上帝冊書羣玉府
仙人宮殿巨鼇山
涼蟾影度秋陰薄
促漏聲來夜唱閒
擁鼻吟多欲愁絕
嚴鐘淒斷樹烏還

合璧事類前集

賦得秋雨

點滴行雲覆苑牆
飄蕭微影度迴塘
秦聲未覺朱弦潤
楚夢先知薤葉涼
野水有波增淡碧
霜林無韻溼疎黃

螢稀燕寂高窗暮正是西風玉漏長

寓意

油壁香車不再逢峽雲無迹任西東梨花院落溶溶月
柳絮池塘淡淡風幾日寂寥傷酒後一番蕭索禁烟中
魚書欲寄何由達水遠山長處處同

春陰

十二重環閤洞房惜惜危樹俯迴塘風迷戲蝶閒無緒
露裊幽花冷自香綺席醉吟銷桂酌玉臺愁作澀銀簧

梅青麥綠江城路更與登高望楚鄉

以上瀛奎律髓

送凌侍郎歸鄉

一作送林侍郎還知宣州

江南藩郡古宣城碧落神仙擁使旌
津吏戒船東下穩縣僚負弩盡歸榮
江山謝守高吟地風月朱公故里情
曾預漢庭三獨坐府中誰敢伴飛觥

曹氏歷代詩選

巢父井

稟生值堯年率性在龐厚安巢一枝上
豈曰鶉居陋穎波人洗耳曾不污牛口
諒茲耕耒暇鑿飲隈林藪含飴

鼓其腹帝力予何有遂令千載外此地存遺甃泓然逼
喬木宛若棲壻舊鄉人揭題榜行旅諧瞻觀我來觀古
蹟愕立徘徊久淒其望清風不獲見師友願言斟復酌
拭面洗心垢翹勤慕高躅感慨陳巵酒思齊胡可望庶
以寬容督夙駕恨長途憑高重回首

汝州志

題東湖涵虛閣

水有支流樹有孫重重門巷挂朱軒三君雅望標人傑
千里澄波隔世喧西對戶庭徐孺宅北傳鐘梵給孤園

欲知嗣續無窮勝兩兩榮歸漢使輜

江西詩話

句

靜尋啄木藏身處閒看遊絲到地時
樓臺冷落收燈夜門巷蕭條掃雪天
已定復搖春水色似紅如白野

棠花

春風任花落流水旋杯行

以上歷代吟譜

樓臺側畔楊

花過簾幕中間燕子飛

青箱雜記

晏
穎

穎殊弟官奉禮郎

臨蛻遺詩

江外三千里人間十八年此時誰復見一鶴上遼天

道山清詒晏穎臨川人丞相元獻公之弟童子時有聲真宗召試翰林院賦官沼瑞蓮賜出身授奉禮郎穎聞報閉書室高臥家人呼之不應拈鎖就視則已蛻去旁得書一紙云云時年十八

張及

及字之元蜀人景德二年進士仁宗朝主管三司鹽鐵出為淮南轉運使

贈黃孫二處士

二公高節厭喧卑同寄蕭宮共展眉
玉樹冰壺齊品格
野雲臯鶴本追隨
泉流指下何人賞
岳峭毫端只自知
眷戀賢侯美風教
故山歸去尚遲遲

茅亭客話黃處士延矩字垂範眉陽人也少為僧性僻而簡常言家習正聲自唐以來待詔金門父隨僖宗入蜀至某四世矣琴最盛于蜀製斲者數家唯雷氏而已咸平中知州馮公知節召孫知微畫俾處士彈琴二公俱止僧舍嘗會愚茅亭進士張及贈詩

贈杜鼎昇

家本樊川老蜀都世家冠劍豈寒儒筆耕尚可儲三載
酒戰猶能敵百夫僻愛舜琴湘水弄每懸孫畫醉仙圖
孟光笑語長相逐喚作梁鴻得也無

茅亭客話杜鼎昇字大舉形神清秀有古人之
風驚書自給夫婦皆八十餘每遇芳時好景選
勝偕行人皆羨其高年逸樂進士張及贈詩云

郎簡

簡字叔廉一字簡之臨安人

一作錢唐人

景德二年

進士歷官右諫議大夫給事中以工部侍郎致

仕家居卒贈吏部侍郎

宋史本傳簡性和易喜賓客卽錢唐城北治園廬自號武林居士導引服餌歲晚顏如丹尤好醫術人有疾多處方療之有集驗方行于世蒙齋筆談卽簡侍郎慶歷中與杜祁公相善謝事居里中築別館徑山下種菖蒲以自餉山中人目為菖蒲田范文正知錢唐亦重其為人揮麈前錄徐度敦立為貳卿明清訪之坐間問曰度今此居號侍郎橋何耶明清應以仁宗朝卽簡以工部侍郎致仕居此杭人德之遂以名橋

訪徐沖晦

湖上訪高士徑深行綠苔應聞山犬吠知是野人來岸

噴出相接柴門自為開林閒清話久薄暮榜舟回

宋文鑑

鮑當

當景德二年進士為河南府法曹歷職方員外

郎有清風集

方勺泊宅編先子至杭創小園在清波門外有詩云安得斷茅環堵地漁樵終老繼清風方知是園乃鮑當郎中故居鮑有詩名清風集時號鮑清風

孤雁

天寒稻梁少萬里孤難進不惜充君庖為帶邊城信

溫公續詩話當為河南法曹初失知府薛暎尚
書意因獻孤雁詩薛大嗟賞自是遊宴無不預
焉不復以掾屬待之時人謂之鮑孤雁薛嘗暑
月詣其廨舍當方露頂狼狽入易服把板而出
之忘其幞頭薛嚴重左右莫敢言者坐久之月
上當顧見髮影大慙以公服袖掩頭而走

松江夜泊

舟閒人已息林際月微明一片清江水中涵萬古情

宋文

鑑

寄西湖擇棲公

兩信海潮喧曉夕百年事過無遺跡舊住招提有幾人

春風苔長湖邊石

送人南歸

淒淒楊柳暮時復一蟬聲滄海不可極風帆難計程微

烟生晚浦斜日上孤城欲寄相思札誰傳萬里情

以上
前賢

小集拾遺

題林和靖隱居

湖水春來綠山雲夏亦繁何如隱君子長嘯掩柴門

文翰

類選

江任

任建陽人景德二年進士官祕閣校理知秦州

句

珠盤臨路泣斗印入鄉提

送人

皇朝類苑

黃覺

覺字民先浦城人景德二年進士為殿中丞

送梅昌言出鎮太原

五馬雍容出鎮時都人爭看好風儀文章一代誼高價

忠直三朝受聖知
帳下軍容生劒戟
門前行色擁旌旗
雲籠古戍黃榆暗
雪滿長郊白草衰
出去暫開貔虎幕
歸來須占鳳皇池
鬢間未有一莖白
陶鑄蒼生固不遲

翠屏筆談梅雅自修飾容儀偉如得詩大喜

周啟明

啟明字昭回處州縉雲人景德中舉賢良方正
罷歸仁宗朝仕至太常丞

句

一丸童子藥五返使臣車

近臣疾愈
朝類苑

皇鵠夷江上畚

田稔牛斗星邊貫索空

送皇甫提刑

楊文公談苑

戚維

維楚丘人堅素先生同文子大中祥符初累官

都官員外郎職方郎中

送何水部蒙出牧袁州

又領親民任星車別紫微隼旟新命重鶴髮故人稀雲

樹看如畫風帆去似飛鄉中諸父老榮羨錦衣歸

袁州府志

孫元方

元方大中祥符初官殿中丞

送何水部蒙出牧袁州

聖君再命擁朱輪合是南方受賜頻
雙鬢任從添白髮六條誰許繼清塵
風牽澤國秋帆遠路入豐州畫錦新
莫為故鄉延去櫂宜春人望待行春

袁州府志

錢丕

丕惟治子大中祥符初官駕部員外郎終光祿

少卿

送何水部蒙出知袁州

白首名郎有幾人，雙旌畫錦不如君。
楚江萍暖烘朝日，玉女衣輕挂曉雲。
極浦仙舟煙澹澹，高秋郡閣葉紛紛。
政成更與他州別，從古宜陽重藝文。

袁州府志

盛元

元大中祥符初屯田員外郎

送何水部蒙出牧袁州

文昌郎位改清資乞領魚符賦式微雉省月寒慵夜直
隼旟風細喜秋歸宜春酒助新開宴侍史香餘舊賜衣
客向西山思井舊莫教漚鳥見人飛

袁州府志

青陽楷

楷蜀人

題玉光亭和章郇公韻

鳴琴賢宰有三長吟得新詞敵夜光好是斷章無以和
神仙官職水雲鄉

信州圖經玉光亭在玉山縣廳之東章郵公詩
碑在馬蜀人青陽楷和韻云云

高 觀

觀字會之宿州蘄人第進士累官集賢院學士

進給事中知單州

海棠

錦里花中色最奇妖嬈天付本來稀綺霞忽照迷紅障
穀露輕籠設翠幃繁榮有情妝媚景纖枝無力帶殘暉
好將繡向羅襟上永作香閨楚楚衣

海棠譜

宋詩紀事卷七

欽定四庫全書

宋詩紀事卷八

錢塘厲鶚撰

杜 衍

衍字世昌越州山陰人大中祥符元年進士仁
宗朝拜同中書門下平章事罷知兗州以太子
少師致仕封祁國公卒贈司徒兼侍中諡正獻

石林詩話杜正獻公自少清羸若不勝衣年過
四十鬢髮即盡白雖立朝孤峻凜然不可屈而
不為奇節危行歐公素出其門公謝事居家歐
適來為守相與甚懽公不甚飲酒唯賦詩酬唱

是時年八十然憂國之意猶慷慨不已每見于色歐和詩有貌先年老因憂國事與心違始乞身公得之大喜常自諷誦當時以謂不惟曲盡公志雖其形貌亦在模寫中也

蔡寬夫詩史杜正獻公以直諫端方名天下平生踐履未有一事少出禮法年過七十謝事始學草書遂盡其妙今使人每見之其英特爽秀無所降屈之氣猶可想見

林下書懷

從政區區到白頭一生寧肯顧恩讐
雙鳬乘雁常深愧野馬黃羊亦過憂
豈是林泉堪佚老只緣蒲柳不禁秋
始終幸會承平日樂聖唯能擊壤謳

皇朝類苑野馬黃羊乃張說傳所謂吾肉非黃羊必不畏啖血非野馬必不畏刺是也

幽居卽事

寂寂復寂寂告老閒居日徑草高於人林鳥熟如客黃

卷不釋手清風常滿室內顧平生心無過此時適

宋文鑑

睢陽五老圖

并序

時祁公年八十

夫蹈榮名而保終吉都貴勢而躋遐考白首一節人
生所難今致政官師相國杜公雅度敏識圭璋巖廟
清德令望龜準當世功成自引得謝君門視所難得

者則安享之謂所難行者則恬居之燕申睢陽與賓
客太原王公故衛尉河東畢卿兵部沛國朱公駕部
始平馮公咸以耆年挂冠優遊鄉梓暇日宴集為五
老會賦詩酬唱怡然相得宋人形於繪事以紀其盛
昔唐白樂天居洛陽為九老會於今圖識相傳以為
勝事距茲數百載無能紹者以今況昔則休烈鉅美
過之明逸遊公之門久矣以鄉閭世契倍厚常品今
假守留鑰日登翹館因得圖像占述序引以代鄉校

詠謠之萬一至和丙申中秋日錢明逸序

五人四百有餘歲俱稱分曹與挂冠天地至仁難補報
林泉幽致許盤桓花朝月夕隨時樂雪鬢霜髯滿座寒
若也睢陽為故事何妨列向畫圖看

事文類聚前集

澠水燕談慶歷末祁公告老退居南京與太子
賓客致仕王渙光祿卿致仕畢世長兵部郎分
司朱貫尚書郎致仕馮平為五老會吟醉相勸
士大夫高之祁公以故相耆德尤為天下傾慕
兵部詩云九老且無元老貴莫將西洛一般看
五人年皆八十餘康寧爽健相得甚歡故祁公
詩云五人四百有餘歲俱稱分曹與挂冠而畢
年最高時九十餘故其詩云非才忝預最高年

是時歐文忠留守睢陽而歎慕借其詩觀之用
次韻卒章云聞說優遊多唱和新詩何惜借傳
看

和孫珪祕丞說章草書

老來楷法不如初試向閒齋習草書下筆何曾見飛動
彫章早已過吹噓伯英比聖功難到懷素稱狂力有餘
若謂伊余堪繼踵只應緣木可求魚

苔溪漁隱叢話

睢水卜居

無似老且病惟恐歸田遲一旦得引年九天還聽卑為

霑二品祿俾盡百年期恩深淪骨髓感極橫涕洟始營
莧表地同向睢水湄城隅最窮僻匠者寧求奇卜築悉
由已軒牖亦隨宜外以庇風雨內以安妻兒燕雀莫羣
噪鷦鷯纔一枝因念古聖賢名為千古垂何嘗廣居室
儉為後人師亞聖樂簞食寢丘無立錐文終防世奪景
相恥家為文園四壁立鄭公小殿移伊余具員者適會
承平時無術毗萬務無才抗四夷為郡亦齷齪勞心徒
孜孜保身亦天幸拊已宜自知開卷顏間厚復懼來者

嗤最哉知止足清白猶可追

合璧事類別集

蓮花

鑿破蒼苔作小池
芰荷分得綠差差
曉來一朵烟波上

似畫真妃出浴時

後村千家詩

鄉有好事者出君謨行草八分書數幅中有梅聖

俞詩一首因成拙句以識二美

莆田筆健與文豪
尤愛南山縣詠高
欲使英辭長潤石
每逢佳句卽揮毫
清如韶濩諧音律
逸似鸞鵠振羽毛

義獻有靈應悵望當時不見此風騷

瀛奎律髓

雨中荷花

翠蓋佳人臨水立檀粉不勻香汗濕
一陣風來碧浪翻
真珠零落難收拾

少室山房續筆叢

寶林寺

中懷無絆外緣閒深掩禪扉客到難
勝景可曾飛錫去
好山多祇捲簾看晝升講座天花落
夜步吟軒海月殘
今日逢師堪論道歸心愁思一時寬

越詠

題懷素自題卷後

狂僧草聖繼張顛卷後兼題大歷年堪與儒門為至寶
武功家世久相傳

遠蒙運使度支以資政范公所寄黃素小字韓文
公伯夷頌請許昌文公淮西富公題詩於後才翁
復綴雅什兼寄長安晏公公亦有作衍久茲休退
人事僅廢不意雅故未移悉以副本為貺俾愚繼
之斷此怔忡既感且愧輒爾率強成拙句奉呈敢

言亦驥之乘聊為續貂之比耳衍上

希文健筆妙韓文文為首陽山下人寧止一言旌義士
欲教萬古勸忠臣頌聲益與英聲遠事蹟還隨墨蹟新
當世宗工復題詠尤宜率爾盡書紳

以上式古堂書考

畢世長

世長天聖中以虞部郎中知台州司農卿致仕

睢陽五老會詩

年九十四歲

非才最忝預高年分務由來近挂冠敢造鉅賢論軌躅

幸依都府得盤桓篇章捧和慙風雅眷待優隆荷歲寒
儻許衰容參盛列欲憑繪事永傳看

事文類聚前集

馮平

平駕部郎中致仕

睢陽五老會詩

年八十七歲

詔恩分務許優閒肯借留都獬豸冠名宦儻來空擾攘
丘園歸去且盤桓醉遊春圃烟霞暖吟聽秋潭水石寒
退傅況兼為隱伴紅塵那復舉頭看

事文類聚前集

王 渙

渙禮部侍郎致仕

睢陽五老會詩

年九十歲

分曹歸政養耆年
李下何由更整冠
賢相賦詩同笑傲
聖君優詔許盤桓
龐眉老叟俱稱壽
凌雪喬松豈畏寒
屈指五人齊五福
鄉人須作二疏看

事文類聚前集

朱 貫

貫兵部郎中致仕

各還朝政遇堯年鶴髮俱宜預道冠乍到林泉能放曠
全拋簪紱尚盤桓君恩至重如天覆相座時親畏地寒
九老且無元老貴莫將西洛一般看

事文類聚前集

曹修古

修古字述之建安人大中祥符元年進士官監
察御史天聖初抗疏忤旨出知興化軍卒贈右
諫議大夫

池上

荷葉罩芙蓉員香暎嫩紅佳人南陌上翠蓋立春風

青箱

雜記

題清心堂

在興化軍治詩刻于壁

天府鞠囚三節日霜臺待漏五更時薰風一覺清涼睡

莫問浮名高與卑

興化府志

曹修睦

修睦修古弟大中祥符元年進士官司封員外

郎分司南京致仕

贈仁曉禪師竹簟

翠筠織簟寄禪齋半夜秋從枕底來若也此時人問道

涼天捲卻暑天開

青箱雜記

葛宮

宮字公雅丹陽人大中祥符元年進士仕至工

部侍郎立方之曾伯祖有青陽集

句

翩翩燕子朱門靜狼藉梨花小院閒

韻語陽秋

蕭貫

貫字貫之臨江軍新喻人大中祥符二年進士
第二累官刑部員外郎知饒州遷兵部員外郎
宮中曉寒歌

十二堯闕隱空綠獸狔呀酒椒壁馥渴烏涓涓不相續
輓轡欲轉霏紅玉百刻香殘隕蓮燭五龍吐水漫寒漿
紅綃佩魚無左璫兩兩懸足瞻扶桑紅萍半規出波面
回首觚棱九霞綯鳴鞘遠從天上來大劒高冠滿前殿

宋史文苑傳貫初感疾夢綠衣中人召至帝所
賦禁中曉寒歌詞語清麗人以比唐李賀
豫章詩話蕭貫少時夢至一宮殿羣女如神仙
一人授紙云此衍波牋煩賦曉寒歌貫援筆立
成云云仙曰子詩甚有奇語異日必貴

程琳

琳字天球博野人祥符四年進士舉服勤詞學
科慶歷中官至鎮安軍節度使同平章事卒贈
太師中書令諡文簡

海棠

海外移根灼灼奇風情閒麗比應稀
晶熒寶萼排珠琲
旖旎芳叢繡帷繁極只愁隨暮雨飄
多何計駐春暉
浣花溪上年年意露濕烟霞拂客衣

海崇譜

司馬池

池字和中陝州夏縣人舉進士歷官至天章閣
待制知河中府徙同州又徙杭州晉州

行色

冷於陂水淡於秋遠陌初窮到渡頭
賴是丹青不能畫

畫成應遣一生愁

中都志行色詩石刻在故安豐縣張文潛作記
云待制司馬公嘗監安豐酒稅作此詩其孫宏
知縣事刻于石梅聖俞嘗言詩之工者寫難狀
之景如在目前含不盡之意見于言外此詩有
馬

燕肅

肅字穆之青州益都人第進士累遷龍圖閣待
制知鄧州以禮部侍郎致仕

宋史本傳肅喜為詩能畫入妙品嘗造指南車
記里鼓二車及敬器以獻又上蓮花漏法在明

州為海潮圖著海潮論二篇

青箱雜記本朝之制待制止繫犀帶遷龍圖閣直學士始賜金帶燕公為待制十年不遷乃作陳情詩上時宰曰鬢邊今日白腰下幾時黃時宰憐之未幾遷直學士

僻居

茅齋城市遠草徑接漁村白日偶無客青山長對門藥
爐留火煖花塢帶烟昏靜坐搜新句冥心傍酒樽

宋文鑑

贈惠山慶上人

陸羽泉邊倚瘦筇參差臺殿映疎松五天講去春騎虎

一鉢擎來晝伏龍像閣磬敲清有韻
蘚庭雪過靜無蹤
相逢多說遊方話知老靈山第幾峯

無錫縣志

蔣堂

堂字希魯宜興人大中祥符五年進士仁宗時
歷官江淮發運使禮部侍郎嘗兩守吳郡後謝
事因家焉自號遂翁有吳門集

贈陳虞卿

寵秩拜春坊歸休識慮長
埽門卑魏勃設醴謝元王

水蓴鱸國羣山橘柚鄉喜君添老社煙駕尚徜徉

中吳紀聞陳之奇字虞卿鄉人以其有賢德故以君子稱之雖閭巷小兒亦知愛敬有爭訟久不決者跨蹇驢至其家以大義感動之皆為之革心自挂冠後閒居十八年熙寧初卒葬花山王岐公為作志題之曰陳君子墓銘始公之謝事也蔣堂侍郎語人曰舉天下皆知有富貴而虞卿獨以知止易衆人之心吾喜林下有人矣

新井歌

井序

堯峯顥遲遲禪師有道行居常遊吾門一日且曰山鑿石造井逾歲僅成旣冽而甘大為叢林之利願得紀

述以永其傳因作歌云

白雲莽莽青山頭一穴四面飛泉流其初山間舊井涸
枯腸燥吻海衆羞于時大士寶雲者頤指土脈智慮周
山靈所感道心爽檀施聿來工力鳩雲鋪齊下遠雷動
石火內擊飛星稠百尺虛空廓地表

自注鑿井求水出土一尺卽有一尺

虛空見內書

一泓清冽呀深幽人疑從天墮月窟或問何處

移龍湫次則其徒駭殊勝競持應器嘗甘柔飢狄連臂
喜跳擲渴烏引喙鳴鉤輶碧甃光中轆轤曉銀牀側畔

梧桐秋寶坊金地互相映谷鮒坎蛙難此留傍俯江形

小衣帶下窺湖面卑浮漚何茲鑿飲有功利一掬入口

醍醐優熱者濯之昏鈍決病者沃之沈痼瘳而我時邀

墨客去松澗遠挈都籃遊淨瓶汲引試香薷雅具羅列

無腥甌

自注茶經種鼎腥甌非器也

比之玉乳不差別

自注曲阿有玉乳泉

誚彼練月多謬悠

自注俗傳天竺有練月井而茶經水記皆不載

今茲泉眼在

魯塢所喜雲液鄰菟裘

自注魯塢乃堯峯地予所居去之一舍

亭翁既往

乏鑒者水記未載予將修此山此井永不廢此歌其庶

傳南州

過葉道卿侍讀小園

秀野亭連小隱堂紅蕖綠篠媚滄浪卞山居士

自注道卿自號

也無歸意卻借吳儂作醉鄉

自注蘇人多遊飲于此園

隱圃

雅得菟裘地清宜隱者心綠葵才有甲青桂漸成陰獨
曳山屐往無勞俗駕尋湛然常寂處水月一菴深

南湖臺

危臺竹樹間湖水伴深閒清溪採香徑方圓明月灣放
魚隨物性載石作家山自喜歸休早全勝賀老還

曉榭水中央茲為隱遯鄉小園香寂寂一派曉泱泱烟

草碧彌岸露桃紅壓牆

自注新植桃一百本

鷗夷儻居此未必入

滄浪

水次揭危亭烟堤四面平栽蘆延宿鷺種柳待啼鶯雪

霽清流漲風來夜艇橫輕微莫臨堅吾老嬾逢迎

以上吳郡

志

吳郡志隱園在靈芝坊樞密直學士蔣堂之居
堂兩守吳謝事因家焉自號遂翁園中有巖扁
水月菴烟蘿亭風篁亭香岫峯古井貪山等堂
嘗自賦隱園十二詠結菴池上名水月宅南小
溪上結宇十餘柱名溪館又築南湖臺于水中
皆有詩

守會稽日修永和故事作

一派西園曲水聲水邊終日會冠纓幾年詩筆無停綴

不似當年有罰觥

會稽志

贈惟政禪師

禪客尋常入舊都黃牛角上挂瓶盂有時帶笠穿雲去

便好和雲作畫圖

西湖高僧事畧惟政禪師字渙然居功臣山淨
土院出入常跨一黃牛慶歷中侍郎蔣公堂贈
詩蓋實錄也

題山亭

山亭深處枕清溪萬木回環盡翠微
梅萼破香知臘近柳梢含綠認春歸
風前列嶂琴三疊雪後羣山玉四圍
顧我此來盤礴久塵勞瀟灑頓忘機

常州府志

句

深鎖煙光在樓閣旋移春色入門牆

題吳殿丞應之新葺兩園園中有紅

梅閣吳有姬曰紅梅因以名閣

吳郡志

蔡齊

齊字子思萊州膠水人大中祥符八年進士第

一仁宗朝拜禮部侍郎參知政事出知潁州卒

贈兵部尚書諡文忠

孔平仲談苑真宗臨軒策士夜夢牆下有菜一
苗甚盛與殿基相高及拆第一卷乃是蔡齊上
見其容貌曰得人矣特詔金吾七人清道自齊
始

小孤山

危峯屹立長江上勢折華胥限百蠻
鰲背孤撐青玉柱斗杓斜插翠雲鬟
月生西海初三夜潮到東吳第一關
安得扁舟多載酒放歌擊楫浪花閒

安慶府志

黃鑑

鑑字唐卿浦城人大中祥符八年進士累遷太
常博士為國史院編修官出倅蘇州有楊文公
談苑楊公筆苑句圖

送李殿省赴任常熟

卽都尉元昆

吳山紫翠倚晴空
潘令風流向此中
雨飽公田方稼稔
春生香徑雜葩紅
絲艫銜尾凌波駛
頽鯉駢頭薦俎豐
玉季情深重睽索
南雲延脰接飛鴻

吳都文粹

謝絳

絳字希深濤之子
以任補校書郎復登大中祥符八年進士甲科
仁宗朝累除知制誥判吏部流內銓
太常禮院出知鄧州有集

儒林公議謝絳吳人有詞藻景祐中知制誥然
輕黠利屑吻人罕測其心人謂之十一面觀音

小隱園詩

井序

余近營別墅於小隱巖忽憶癸酉冬春詔逆虜使於
陳橋驛夢中偶賦及寤寫在牘背今因巖名知所賦
三言前契矣遂足為八句

僕本塵外士功名若毫末因尋小隱園忽見羣芳發昔
夢宛可記靈契方茲達會須挂朝纓歸弄巖前月

荅梅聖俞問隱

聖俞一紙書問我小隱居小隱詎有異築室數畝餘巖
壑不峻崴田園非美腴所欲近丘墓歲時來埽除先人
夢讀史遵道本聖徒絕筆於此詩子孫無忽諸刻石置
中堂但使過者趨題榜為服訓義取銘盤孟後嶺雙松
亭徑術何縈迂下臨富春渚萬象生有無東偏作草舍
可以施琴壺門前碧塘水萬本栽荷葉風來觸香氣長
著人衣裾溪水泱泱流黍稻可勿枯柔桑及美果種廣
莫記株澗草不識名野禽多異呼坐此易歲晏漸與人

世疎在昔東陵侯瓜壠猶親鉏楊惲謝九列種豆南山
隅余嘗考槃賦從我者誰歟近來傳越石趣尚若不殊
儻閒丘壑徑不願升斗儲如君美材具日月升雲衢安
敢預招挽粗自陳其愚

以上杭州府志

富春遺事梅聖俞堯臣與謝希深為詩文友互相切劘希深居富陽小隱山別築室曰讀書堂構雙松亭于前倚山臨江雜植花果沼荷稻圩環流布種頗稱幽人之居聖俞慕悅其風時以詩文問荅倡和一時傳為雅事云

句

王貌閒如鶴黃吟苦似猿

職官分紀國朝天聖中修國史王安簡謝陽夏李昉鄆黃唐卿為編修官安簡神情沖澹唐卿刻意篇什謝戲為句云云

范仲淹

仲淹字希文其先邠人後徙吳縣大中祥符八年進士仁宗朝擢右司諫歷樞密副使參知政事以資政殿學士為陝西四路宣撫使知邠州徙鄧州荆南杭州青州卒贈兵部尚書謚文正

有丹陽集

孔平仲談苑范文正公幼孤隨母適朱氏因冒
朱姓後復本姓啟曰志在投秦入境遂稱于張
祿名非霸越乘舟乃效于陶朱

老學菴筆記范文正公喜彈琴止彈履霜一操
時人謂之范履霜

牡丹

陽和不擇地海角亦逢春憶得上林色相看如故人

澠水燕談海陵西溪鹽場初呂文靖公嘗官于
此手植牡丹一本有詩刻石後范文正公亦嘗
臨蒞復題一絕人以二公詩筆貴重護欄歲久
茂盛每歲花開百朵為海濱奇觀

淮上遇風

一櫂危如葉傍觀欲損神他年在平地無忽險中人

后山詩話雖弄翰戲語卒然而作其濟險加澤未嘗忘也

懷慶朔堂

曰琯按饒州府志堂在舊州治內公謫守時建

慶朔堂前手自栽便移官去未曾開如今憶著成離恨
祇託春風管領來

卻掃編春風鄱陽天慶觀道士也其所居之室曰春風軒因以自名公在郡時與之遊今移守丹陽蓋以寄之云

西溪叢語公守鄱陽喜樂籍未幾召還作詩寄

後政云云到京以綿臙脂寄其人題詩云江南有美人別後長相憶何以慰相思贈汝好顏色至今墨跡在鄱陽士大夫家

贈葉少卿

退也天之道東南事了人風波拋舊路花月伴閒身湖外扁舟遠門中駟馬新心從今日泰家似昔時貧見子登西掖攜孫過北隣白雲高閣曙淥水後池春尊酒呼前輩爐香叩上真只應陰德在八十富精神

中吳紀聞葉參字少列嘗守吳郡既謝事因居焉其子清臣字道卿登禁從持本路漕節侍養

金匱要略卷八
搢紳榮之范文正公贈以詩

觀風樓

高壓郡西城觀風不浪名山川千里色語笑萬家聲
碧寺煙中靜紅橋柳際明登臨豈劉白滿目是詩情

中吳紀聞子城之西舊建樓其上名觀風在唐
但謂之西樓白樂天有西樓命宴詩後改為觀
風今復名西樓矣公作守時賦詩

虎丘

昔見虎眈眈今為佛子巖雲寒不出寺劍淨未離潭
幽

步蘿垂徑高禪雪閉菴吳都十萬戶烟瓦徧東南

木蘭堂

堂在郡治後唐張搏自湖州刺史移蘇州于堂前大植木蘭花當盛開時燕郡吏詩

客

堂上列歌鐘多慙不如古卻羨木蘭花曾見霓裳舞

自注

白樂天為蘇州刺史常教此舞

野色

非烟亦非霧
冪冪映樓臺
白鳥忽點破
殘陽還照開
肯隨芳草歇
疑逐遠帆來
誰會山公意
登高醉始回

林下偶談范文正此詩不下司馬池行色之作
梅聖俞所謂寫難狀之景如在目前也

芝山寺

在廬山

樓殿冠崔嵬靈芝安在哉雲飛過江去花落入城來得
食鴉朝聚聞經虎夜回偶臨西閣望五老夕陽開

饒州作

三出邊城鬢似絲齋中瀟灑過禪師每疎歌酒緣多病
不負雲山賴有詩半雨黃花秋賞健一江明月夜歸遲
人間禍福何須道問著衰翁也自知

送鄞尉竇君

片帆飛去若輕鴻
一霎春潮過浙東
王謝江山久蕭索
子真今為起清風

送丁司理赴明州

仙家枝葉令威孫
南去司刑庇越民
金闕道書微旨在
獄多陰德是真人

道書謂升真者皆須曾為獄官

瀟灑桐廬郡

瀟灑桐廬郡
烏龍山靄中
使君無一事
心與白雲空

瀟灑桐廬郡家家竹引泉令人思杜牧無處不潺湲
瀟灑桐廬郡全家長道情不過歌舞事繞舍石泉聲

瀟灑桐廬郡嚴陵舊釣臺江山如不勝光武肯教來

以上

范文正公集

嚴陵祠

漢包六合網英豪一箇冥鴻惜羽毛世祖功臣三十六

雲臺爭似釣臺高

湘山野錄

北固樓

北固高樓海氣寒使君應此凭闌干春山雨後青無數

借與淮南子細看

方輿勝覽

桐廬方正父家藏唐翰林畫白芍藥予來領郡事

因獲一見感歎久之題二十八字景祐元年十月

七日

治亂興衰甚可嗟徒憐水調訴榮華開元盛事今何在

尚有霓裳寄此花

困學齋雜錄

滕宗諒

宗諒字子京河南人大中祥符八年進士從泰
州軍事推官召試學士院改大理寺丞歷左司
諫出知湖虢岳蘇四州

贈回道士

華州回道士來到岳州城別我遊何處秋空一劍橫

東軒筆錄宗亮謫守巴陵郡有華州回道士上
謁風骨聳秀神宇清邁滕知為異人口占一詩
贈之

遊茅山

句曲山中古洞天金堂玉室地相連方當遽子知非日
已過茅君得道年

鎮江府志

王 益

益字舜良臨川人荆公之父祥符八年進士任
蜀之新繁令至都官員外郎

和梅公儀留題重光寺羅漢院贈憲上人

曉剃吟髭雪半零海窗曾呪鉢龍醒早同西竺能持法
應笑南僧不會經雲氣晝閒侵塵柄蘚痕春老上銅瓶

近來禪觀都無語手指餘花滿寺庭

成都文類

詹中正

中正衢州人大中祥符八年甲科時稱詹白雲

退居

宦情文思競闌珊利戶名樞莫我關無可奈何新白髮
不如歸去舊青山須知百歲都為夢未信千金買得閒
珍重尊中賢聖酒非因風月亦開顏

句

吟餘妓散杯中酒歸去蜨隨頭上花

以上瀛奎律髓

田 況

況字元均冀州信都人舉進士甲科復舉賢良
方正累遷右正言知制誥以右諫議大夫知成
都府召為御史中丞樞密使終尚書右丞贈太
子太保諡宣簡有金巖集

琴堂

西漢文章世所知相如閎麗冠當時遊人不賞凌雲賦

只說琴堂是故基

成都遨樂詩

元日登安福寺塔

歲歷起新元錦里春意早
詰旦會朋寮羣遊僕騶導
像塔倚中霄翬檐結重櫺
隨俗縱危步超若薄清昊
千里如指掌萬象可窮討
野闊山勢迴寒餘林色老
遨賞空閭巷竭來喧稚耄
人物事多閒車馬擁行道
顧茲歡娛俗良慰羈遠
抱第念民政疎無庸荅宸造

二十八日謁生祿祠遊淨衆寺

千騎出重闔嚴祠淨宇鄰映林沽酒旆迎馬獻花人豔
日披紅霧香颺起路塵韶華特明媚不似遠方春

三月三日登學射山

麗日照芳春良辰重元巳陽濱修祓除華林程射技所
尚或不同從俗亦足喜門外盛車徒山半列鄽市彩棚
飛鏞遠醉席歌聲起回頭望城郭烟靄相表裏秀色滿
郊原遙影落川渚目倦意猶遠思餘情未已登高貴能

賦感物暢幽旨宜哉賢大夫由斯見春美

四月十九日汎浣花谿

浣花溪上春風後節物正宜行樂時十里綺羅青蓋密
萬家歌吹綠楊垂畫船疊鼓臨芳渚絲閣凌波汎羽卮
霞錦漸曛歸櫂促滿城懽醉待旌旗

以上成都文類

种放

放字明逸洛陽人隱終南山之豹林谷後以薦
授左司諫累遷諫議大夫辭歸大中祥符八年

終工部侍郎有集

湘山野錄真宗初詔种隱君至闕以數對稱旨
日既高中人送中書膳諸相皆盛服以俟种至
止長揖而已楊大年以詩嘲之曰不把一言裨
萬乘祇又雙手揖三公上聞之獨召楊曰知卿
有所奏种某安知無一言裨朕乎出一阜囊內
澄懷錄种明逸嗜酒嘗種秫自釀曰空山清寂
聊以養和自號雲谿醉侯

詩話總龜太平興國中李繼遷以西夏叛朝廷
興師追十餘年至咸平末章聖有厭兵之意處
士种放在山中有詩云狂徒負恩信聖主恥干
戈章聖聞之卽遣使召至授左司諫會景德初
繼遷死其子德明願納款遂罷兵故拜官復歸
終南終于工部侍郎

瀟湘感事

離離江草與江花往事洲邊一歎嗟
漢傳有才終去國
楚臣無罪亦沈沙
淒涼野浦飛寒雁
牢落汀祠聚晚鴉
無限清忠歸浪底
滔滔千頃屬漁家

古今詩話

寄二華隱者

我本厭虛名致身天子庭
不終高尚事有愧少微星
北闕空追悔西山羨獨醒
秋風舊期約何日去冥冥

老學菴筆

記

夏日山居

陰陰林木靜寂寂無人境
紅綻紫葳香嵐沈玉膏
冷看雲時獨坐慎事當中省
何客馭風來新篁動疎影

宋文鑑

無題

丹樓縹緲路歧傍
共說祈真白玉堂
珠樹風高低絳節
靈臺香冷醺虛皇
名傳六合何昭晰
事隔三清限渺茫
欲識當年漢家意
竹宮梧殿更淒涼

玉照新志

黃康弼

題廣化寺阿育王塔

齊野非吳渚支郎是子陵釣臺千古月寶塔萬年燈

于欽齊乘阿育王塔在臨淄城西唐太和中建寺五代無棣僧道圓居之與宋太祖有舊加號蓋國大師塔增為十二級祥符中更名廣化寺黃康弼詩云云

李湛

湛大中祥符間祕書監

永慶寺

在常熟

巖扉開早涼谷鳥分遠翔花氣濕幽徑磬聲清上方雲

生松澗底花落蘚池傍致有遺榮意移時坐石牀

吳郡志

破山興福寺

在常熟卽常建題詩處

雲門十里長殿塔明朝陽半夜風雨至滿山松桂香清
猿嘯遠樹好鳥鳴虛廊塵纓斷可濯胡為語滄浪

破山寺志

龍昌期

昌期字起之陵州人祥符中遊京師明鎬奏授
太子洗馬明堂汎恩改殿中丞有竹軒小集

宋史劉敞傳蜀人龍昌期著書傳經以詭僻惑
衆文彥博薦諸朝賜五品服敞與歐陽修俱曰

昌期違古畔道學非而博王制之所以誅未使
卽少正卯之刑已幸矣又何賞焉乞追還詔書
昌期聞之懼不敢受賜

三山卽事

百貨隨潮船入市萬家沽酒市垂帘蒼烟巷陌青榕老

白露園林紫蔗甜

翰墨大全

蘇為

為祥符間知邵武軍又嘗知宣州湖州

湖州作

野艇閒撐處湖天景亦微春波無限綠白鳥自由飛柳
色濃垂岸山光冷照衣時攜一壺酒戀到晚涼歸

青箱雜記為湖州詩數十首惟此篇足為絕唱

宣城花

宣城花疊嶂樓前簇綺霞若非翠露陶潛宅卽是紅藏
小謝家

青箱雜記為在宣城有詩十首皆以宣城為目
內宣城花一首尤為清麗

邵武作

愛重八九月登臨高下樓林紅雲白處寒瀨泊漁舟

同上

句

夜浪珠還浦春泥象印蹤

送劉端州

楊文公談苑

賈同

同字希得臨淄人舉進士除大理評事通判兗

州累遷殿中丞知棣州卒門人私謚存道先生

示蔡通判

聖君恩重龍頭選慈母年高鶴髮垂君寵母恩俱未報

酒如成病悔何追

合璧事類蔡文忠公齊喜酒飲量過人既登第
通判濟州日飲醇酎往往至醉是時太夫人年
已高頗憂之一日賈存道先生過濟文忠館之
數日先生愛文忠之賢慮其以酒廢學生疾乃
為詩示文忠云云文忠瞿然起謝自是非親客
不對酒終身未嘗至醉

方仲荀

仲荀祥符中以尚書屯田員外郎知蘇州

虎丘

海涌起平田禪扉古木閑出城先見塔入寺始知山堂

靜參徒散巢喧乳鶴還祖龍求寶劍曾此鑿孱顏

吳郡志

陳綱

綱太常博士知晉州

留題霍山應聖公廟

石刻在霍州

峻極巍巍勢望雄
層巒疊嶂翠重重
為神有感興唐祚
作鎮無疆福晉封
材產十州資構厦
泉分數邑潤耕農
幽巖舊榻高人隱
絕頂遺墳古帝蹤
欲雨片雲生峭壁
未明先日照危峯
斷崖當午晴雷震
深壑經秋積靄濃

樵去每逢游洞鹿僧禪時見戲潭龍名光祀典傳千載

御祝牲牢致享恭

大中祥符五年六月二十五日岢嵐軍判官鄭世卿書栗再興刻字求

古錄

趙宗萬


宗萬字仲困越州人大中祥符間詔舉遺逸被

召不起

句

斗懸金印心難動屏列春山眼暫開

萬姓統譜趙宗萬築室于越郡之照水坊左瞰
平湖前挹秦望畜一鶴號丹砂引以為侶讀書
鼓琴怡然自適祥符中詔舉遺逸郡守康戩以
宗萬薦尋被召因獻跋鼈傳以自見且請自託
于道家者流朝廷不奪其志卽其家賜以羽服
後十餘年卒嘗為詩云云



宋詩紀事卷八